

摘藻堂四庫全書薈要

經部

欽定四庫全書薈要

經部

禮記集說卷五十七

詳校官編修臣程嘉謨



欽定四庫全書薈要卷二千一百八十五

經部

禮記集說卷五十七

宋 衛湜 撰

五行之動迭相竭也五行四時十二月還相為本也五
律十二管還相為宮也五味六和十二食還相為
質也五色六章十二衣還相為質也

鄭氏曰竭猶負戴也言五行運轉更相為始也五聲
宮商角徵羽也其管陽曰律陰曰呂布十二辰始於
黃鍾管長九寸下生者三分去一上生者三分益一

終於南呂更相為宮凡六十也五味酸苦辛鹹甘也
和之者春多酸夏多苦秋多辛冬多鹹皆有滑甘是
謂六和五色六章畫績事也周禮考工記曰土以黃
其象方天時變火以圜山以章水以龍鳥獸蛇雜四
時五色之位以章之謂之巧也

孔氏曰前既論天地故此更論五行之動動謂運轉
物之在人上謂之負戴氣之過去在上者其在下者
亦負戴也春為木王負戴於水後更相為始負戴前

氣也孟春則以建寅之月為諸月之本仲春則以建
卯之月為諸月之本是還廻迭相為本也六律謂陽
律也舉陽律則陰呂從之可知故十二管也鄭註其
管陽曰律至三分益一皆律厯志文十二管更相為
宮以黃鍾為始當其為宮備有五聲言黃鍾下生林
鍾林鍾上生大蕤大蕤下生南呂南呂上生姑洗姑
洗下生應鍾應鍾上生蕤賓蕤賓上生大呂大呂下
生夷則夷則上生夾鍾夾鍾下生無射無射上生中

呂此則相生之次也隨其相生之次每辰各自為宮
各有五聲十二管相生之次至中呂而匝黃鍾為第
一宮下生林鍾為徵上生大蕤為商下生南呂為羽
上生姑洗為角林鍾為第二宮上生大蕤為徵下生
南呂為商上生姑洗為羽下生應鍾為角大蕤為第
三宮下生南呂為徵上生姑洗為商下生應鍾為羽
上生蕤賓為角南呂為第四宮上生姑洗為徵下生
應鍾為商上生蕤賓為羽上生大呂為角姑洗為第

五宮下生應鍾為徵上生蕤賓為商上生大呂為羽

下生夷則為角應鍾為第六宮上生蕤賓為徵上生

大呂為商下生夷則為羽上生夾鍾為角蕤賓為第

七宮上生大呂為徵下生夷則為商上生夾鍾為羽

下生無射為角大呂為第八宮下生夷則為徵上生

夾鍾為商下生無射為羽上生中呂為角夷則為第

九宮上生夾鍾為徵下生無射為商上生中呂為羽

上生黃鍾為角夾鍾為第十宮下生無射為徵上生

中呂為商上生黃鍾為羽下生林鍾為角無射為第
十一宮上生中呂為徵上生黃鍾為商下生林鍾為
羽上生大蕤為角中呂為第十二宮上生黃鍾為徵
下生林鍾為商上生大蕤為羽下生南呂為角是十
二宮各有五聲凡六十聲南呂最處於末故終於南
呂是還廻迭相為宮也每月之首各以其物為質是
十二月之食還相為質也鄭註六和周禮食醫之文
也四時四味皆有滑有甘益之為六也五色謂青赤

黃白黑據五方也六章者兼天玄也以玄黑為同色則五中通玄續以對五方則為六色是六章也為十二月之衣則各以色為質故云還相為質也其十二管每月各一故得還相為宮其食與衣唯有四時之異故周禮春多酸月令食麥與羊春衣青是春三月其食與衣皆同也夏秋冬亦然無月別之異此云十二食十二衣者似月各別衣食也熊氏謂異代之法或則每時三月衣食雖同大總言一歲之中有十二

月之異故總云十二也

新安朱氏曰案五聲相生至於角位隔八下生當得
宮前一位以為變宮五聲之正至此而窮又自變宮
隔八上生當得徵前一位以為變徵餘分不可損益
而其數又窮故立均之法至於是而終焉孔氏以本
文但云五聲十二管故不及二變而止為六十聲增
入二變二十四聲合為八十四聲自唐以來法皆如
此云

長樂劉氏曰冬水盛也而生木春木盛也而生火夏火盛也而生土長夏土盛也而生金秋金盛也而生水五行相生終而又始天地之常理也金克木木克土土克水水克火火克金五行相克以成其性以竭其才故靜則相生天之道也動則相竭地之道也五行四時十二月還相為本者根本也君也言其相生皆以氣之盛者為本雖然盛過於中則陰陽之氣不和是以相克之義生焉然後還相不失其和而日月

五星四時五行山川萬物罔不順其序而遂其性也
故五聲六律十二管還相為宮此以聲測陰陽之和
否也五味六和十二食還相為質此以味調陰陽之
逆順也五色六章十二衣還相為質此以服配陰陽
之盛衰也

長樂陳氏曰五行之動迭相竭者言竭猶所謂休也
休則有王故竭則有盈也五行四時言十二月還相
為本者一行直於一時之月則四者皆為末也五聲

言其氣之所在故言本五味五色言其形之所尚故言質而已 又禮書曰先王因天地陰陽之氣而辨

十有二辰因十有二辰而生十有二律統之以三故黃鍾統天林鍾統地大蕤統人所以象三才生之以八故黃鍾生林鍾林鍾生大蕤大蕤生南呂之類所以象八風律左旋而生呂則為同位所以象夫婦呂右轉而生律則為異位所以象子母六上所以象天之六氣五下所以象地之五行其長短有度其多寡

有數其輕重有權其損益有宜始於黃鍾終於中呂
黃鍾大簇姑洗損陽以生陰林鍾南呂應鍾益陰以
生陽蕤賓夷則無射又益陽以生陰大呂夾鍾中呂
又損陰以生陽何則黃鍾至大簇陽之陽也林鍾至
應鍾陰之陰也陽之陽陰之陰則陽息陰消之時故
陽常下生而有餘陰常上生而不足蕤賓至無射則
陰之陽也大呂至仲呂則陽之陰也陰之陽陽之陰
則陽消陰息之時故陽常上生而不足陰常下生而

有餘然則自子午以左皆上生子午以右皆下生矣
鄭康成以黃鍾三律為下生以蕤賓三律為上生其
說是也班固則類以律為下生呂為上生誤矣書云
聲依永律和聲則律非五聲不能辨聲非十二律不
能和五聲非變則不能盡故一律之中莫不具五聲
五聲之外有所謂二變黃鍾為宮則林鍾為徵大簇
為商南呂為羽姑洗為角應鍾為變宮蕤賓為變徵
林鍾為宮則大簇為徵南呂為商姑洗為羽應鍾為

角蕤賓為變宮黃鍾為變徵以至十律之為宮餘律之為商角徵羽為二變旋之為十二宮析之為八十四聲類皆五位為五音第之至六為變宮又第之至七為變徵及八然後宮復旋矣此六律之大致也京房之徒推而蔓之至於三百六十以直三百六十日不可考也然陽盡變以造始故每律異名陰體常以效法故止於三鍾三呂而已則鍾者物所聚也呂者物所正也夾鍾亦謂之園鍾林鍾亦謂之函鍾南呂

亦謂之南事中呂亦謂之小呂不特此也六律亦謂之六始六呂亦謂之六間亦謂之六同蓋圜鍾以春主規言之也林鍾以夏苾物言之也南事則陰之所成者事而已小呂則陰之所萌者小而已律所以述陰陽也始所以始六陰也呂其體也間其位也同其情也然皆述陰陽而已故皆謂之十二律也 又禮書曰大司樂所以序圜鍾為宮黃鍾為角大蕤為徵姑洗為羽此律之相次者也函鍾為宮大蕤為角姑

洗為徵南呂為羽此律之相生者也黃鍾為宮大呂
為角大蕤為徵應鍾為羽此律之相合者也先儒謂
夾鍾生於房心之氣房心天帝之明堂故為天宮林
鍾生於未之氣未坤之位故為地宮黃鍾生於虛危
之氣虛危為宗廟故為人宮此說是也蓋天帝之明
堂東南方也帝與萬物相見於是出焉坤之位西南
方也物於是致養焉宗廟北方也物於是藏焉其為
三宮宜矣然言天宮不用中呂林鍾南呂無射人宮

避林鍾南呂姑洗蕤賓不用者卑之也避之者尊之也以為天宮不用地宮之律人宮避天宮之律然則人宮用黃鍾孰謂避天宮之律耶 又樂書曰周官

凡樂圜鍾為宮黃鍾為角大蕤為徵姑洗為羽凡樂
函鍾為宮大蕤為角姑洗為徵南呂為羽凡樂黃鍾
為宮大呂為角大蕤為徵應鍾為羽蓋天五地六天
地之中合也故律不過六而聲亦不過五其旋相為
宮又不過三以備中聲而已樂以中聲為本而倡和

清濁迭相為經故以仲春之管為天宮仲冬之管為人宮中央長夏之管為地宮國語有四宮之說不亦妄乎今夫旋宮之樂十二律以主之五聲以文之故圜鍾為宮而無射為之合黃鍾為角而大呂為之合大蕤為徵而應鍾為之合姑洗為羽而南呂為之合凡此宮之旋而在天者也函鍾為宮大蕤為角姑洗為徵南呂為羽而交相合焉凡此宮之旋而在地者也故其合降而為三黃鍾為宮大呂為角大蕤為徵

應鍾為羽而兩兩合焉凡此宮之旋而在人者也故
其合又降而為二在易上經言天地之道下經言人
道而元亨利貞之德乾別為四坤降為二咸又降為
一亦此意也蓋一陰一陽之謂道天法道其數參而
奇雖主乎一陽未嘗不以一陰成之故其律先陰而
後陽地法天其數兩而偶雖主乎二陰未嘗不以二
陽配之故其律或上同於天而以陰先陽或下同於
人而以陽先陰人法地則以同而異此其律所以一

於陽先乎陰歟大抵旋宮之制與著卦六爻之數常
相為表裏著之數分而為二以象兩儀掛一以象三
才揲之以四以象四時歸奇於扚以象閏而六爻之
用抑又分陰分陽迭用柔剛則知陰陽之律分而為
二亦象兩儀之意也其宮則三亦象三才之意也其
聲則四亦象四時之意也餘律歸奇亦象閏之意也
分樂之序則奏律歌呂亦分陰分陽之意也三宮之
用則三才迭旋亦迭用柔剛之意也十有二律之管

禮天神以圜鍾為首禮地示以函鍾為首禮人鬼以黃鍾為首三者旋相為宮而商角徵羽之管亦隨而運焉則尊卑有常而不亂猶十二辰之位取三統三正之義亦不過子丑寅而止耳禮運曰五聲六律十二管旋相為宮如此而已先儒以十有二律均旋為宮又附益之以變宮變徵而為六十律之準不亦失聖人取中聲寓尊卑之意耶

秦溪楊氏曰陳氏禮書所謂天宮取律之相次者圜

鍾為宮園鍾為陰聲之第五陰將極而陽生矣故取黃鍾為角黃鍾陽聲之首也大簇為徵大簇陽聲之第二也姑洗為羽姑洗陽聲之第三也此律之相次也地宮取律之相生者函鍾為宮函鍾上生大簇故大簇為角大簇下生南呂南呂上生姑洗故南呂為徵姑洗為羽此律之相生也人宮取律之相合者黃鍾子大呂丑故黃鍾為宮大呂為角子與丑合也大簇寅應鍾亥故大簇為徵應鍾為羽寅與亥合也此

律之相合也天道有自然之秩序故取律之相次者以爲音地道資生而不窮故取律之相生者以爲音人道相合而相親故取律之相合者以爲義以此觀之則鄭氏謂天宮不用中呂林鍾南呂無射人宮避林鍾南呂姑洗蕤賓其說鑿矣

嚴陵方氏曰交相爲用故曰迭相竭言相竭如此則相生相克亦若是而已以至所別之聲所食之味所被之色皆出於此故繼言五聲五味五色焉五行播

而為四時四時合而為十二月積陽成暑積陰成寒
陽生於子陰生於午各以所生之氣為本故曰還相
為本五聲比而為六律六律偶而為十二管陽旋而
左陰旋而右益陰生律損陽生同各以所生之音為
宮故曰還相為宮五味調而為六和衍而為十二食
十二食則六穀六牲是也若牛宜稌羊宜黍豕宜粱
之類則各以所宜者為質故也十二衣則六冕六服
是也若祀昊天上帝服裘冕饗先王服衮冕之類則

各以所服者為質故曰還相為質質猶射之有質而
以取正為義五味五色各有正也故以質言之莊子
曰四者孰知正味又曰四者孰知正色則味色各有
正也凡此皆周而復始故以還言之猶於五行之動
言迭者主動而言故也

馬氏曰四時者五行之運十二月者四時之積故還
相為本還相為本者若盛德在木以木為主盛德在
金以金為主此所謂相為本也律者所以律宣陽氣

也呂者所以呂宣陰氣也十二月之食若春食麥羊則以麥羊為質夏食菽雞則以菽雞為質此所謂相為質也六章者言燦然有文章也故還相為質若春衣青則以青為質夏衣赤則以赤為質也

延平周氏曰五行之動迭相竭也者如木竭則火盈火竭則金盈也五行四時十二月還相為本也者如木行為本於春之月則水火土金皆木也五聲六律十二管還相為宮也者十二律各具五聲而還相為

宮也五行者四時十二月之所自出五聲者六律十二管之所自出五味之於六和十二食五色之於六章十二衣亦若是而已矣四時者間於十二月者也六律者間於十二管者也六和之於十二食六章之於十二衣亦若是而已矣十二食即周官所謂鼎十有二十二衣即舜之十二章

山陰陸氏曰竭盡也水王則金竭木王則水竭王文公曰此立而彼竭也六和五味中六和也六章五色

中六章也言五味五色矣又言六和六章蓋文章經緯之體春秋傳曰為六畜五牲三犧以奉五味於六畜中又數五牲五牲中又數三犧蓋亦如此

蔣氏曰五行造化之樞要也迭相窮盡變通無極而後三才之道立焉鯀因洪水而汨陳之殛倫攸斃天乃興禹錫以皇極九疇而後得其叙也由今觀洪範之書五行居其首而後五政八事三德庶徵六極之類次第而舉矣是則有五行而後有五聲五味與五

色有四時十二月而後有六律十二管六和十二食
與六章十二衣天人相因其用無盡方天一生水地
六成之是時之為冬者然也而金為之本矣地二生
火天七成之是時之為夏者然也而木為之本矣五
聲之本生於黃鍾三分去一下生林鍾是律中林鍾
之管也而黃鍾為之宮矣林鍾三分益一上生大蕤
是律中大蕤之管也而林鍾為之宮矣五味各有所
主而調以滑甘因謂六和五色各有所尚而天玄地

黃因謂六章質之月令稽之內則訂之考工若是其
有成數也而食齋視春時羹齋視夏時略以見飲食
還相為質之道居青陽而衣青衣乘朱路而服赤玉
亦足以知服色變通之宜蓋物以故而滯禮以運而
久造化自然之數麗於奇偶之定形天人不窮之機
本於運用之迭出靜不極則動不著損不極則益不
生厭故而取新處積而能化古先聖人順陰陽消長
之變制衣服居處之宜其意蓋若此而已

龍泉葉氏說見前

故人者天地之心也五行之端也食味別聲被色而生者也

鄭氏曰此言兼氣性之效

孔氏曰自此至不失一節以上經論人稟天地五行氣性而生此以下論稟氣性之有效驗也人生天地之中動靜應天地天地有人如人有心故云天地之心也端猶首也萬物悉由五行而生而人最得其妙

明仁義禮智信為五行之首也五行各有味有聲有
色三者最為彰著而人皆稟之以生故為五行之端
也言食言別言被隨義而言也此並是五行彰著之
事而人氣性有之故鄭註云兼氣性之效也而王氏
肅曰人於天地之間如五藏之有心矣人乃有生之
最靈其心五藏之最聖也

五峯胡氏曰人者天地之精也故行乎其中而莫禦
五行萬物之秀氣也故物為之用而莫違

江陵項氏曰何謂天地之心曰仁而已矣天地之至仁寓之於人纔有人形即有仁心故曰仁者人也又曰仁人心也又曰人者天地之心也復所以能見天地之心者以其有生意也凡果實之心皆名曰人字亦作仁故天地之心亦名曰人々之名蓋出於此

長樂陳氏曰物之體常在外而心常在中天地者人之體故人者天地之心也人非五行不因而五行非人不成故人者五行之端始也所食者五味所別者

五聲所被者五色此人之所以生也上言聲與色自然之序故先聲而後味味而後色以明有氣而後有形也此言人之所用聲味與色之序故食味而後別聲別聲而後被色以明由內以及外也

馬氏曰天高地下而人位乎兩間以生也故曰人者天地之心萬物散殊而在天地之間莫不鍾五行之氣而人則受其氣之秀者也故曰五行之端五行莫不有其味先王因之以為五味六和十二食所以順

其味五行莫不有其聲先王因之以為五聲六律十二管所以順其聲五行莫不有其色先王因之以為五色六章十二衣所以順其色有曰人者天地之德五行之秀氣有曰人者天地之心五行之端何也蓋言天地之德者以其性之所受之中也言天地之心者以其為人所處之中也秀者言其精而不粗端者言其本而非末也

長樂劉氏曰五行者天地之子而人為之長故曰端

焉口所食者五味也不食則病矣耳所別者五聲也
不別則聾矣身所被者五色也不被則禽矣仰此以
為生凡人不教所自能也而於聲色衣食有得有失
七情生焉聖人防其情之過中而反為身禍也乃作
禮法制度其心俾人人用足而不傷乎物之生也事
事有則而不汨其性也

嚴陵方氏曰天地散而為五行故仁之端則木之性
所立也義之端則金之性所立也以至火之於禮水

之於知土之於信亦若是而已故曰五行之端也五行滋而為五味人以養其口感而為五聲人以養其耳形而為五色人以養其目然後人得而生焉故曰食味別聲被色而生者也食之於口別之於耳被之於身莫不有所別焉獨於聲言別者則以微妙尤宜致別故也然其序前以聲為首此以味為首蓋探其本則聲為妙要其用則味為急

四明沈氏曰易言裁成輔相中庸言知天地之化育

贊天地之化育究竟天地是天地大人但可知贊裁
成輔相爾俱不若禮運言人者天地之心也耳目視
聽若無心何以運用天地若無人何以全得廣大直
是倚人為心豈特知贊裁成輔相而止耶

蔣氏曰上章既言人者天地之德五行之秀氣至此
復言人者天地之心五行之端蓋德言其自得心言
其能運氣證其所自稟端究其所從始名雖不同其
實一也至於食味別聲被色則人所以為萬物之靈

者昭然有可考之實矣且鳥俯而啄仰而四顧味有所不辨也五味六和惟人能辨而食之瓠巴鼓琴流魚出聽物有萬一而然耳聲有所不別也五聲六律惟人能別而聽之生而羽毛以禦寒暑物莫不皆然耳色不能自擇也五色六章惟人能擇而被之蓋圓形而供人者為物任智以役物者為人由是觀之人具耳目備口體視明而聽聰飲食有具而服用有適蓋其得於天者本如是而已情欲一恣性天牿亡或

至於養一指而失肩背是自失其所以食味者也
好鄭聲而厭雅樂是自失其所以別聲者也
忘正色而好奸色是自失其所以被色者也
然則食味別聲被色夫人同此生生之具其或流而不知止
徇而不知反聖人何以約而歸之於中曰因天理之自然制人情之或過
自聖人作則必以天地為本以下無非立治人之要道以制事物之命
使天下通性情之正者也

龍泉葉氏說見前

故聖人作則必以天地為本以陰陽為端以四時為柄以日星為紀月以為量鬼神以為徒五行以為質禮義以為器人情以為田四靈以為畜

鄭氏曰天地以至五行其制作所取象也禮義人情其政治也四靈者其徵報也量猶分也鬼神謂山川也山川助地通氣之象也器所以操事田人所掇治也

孔氏曰則法也本根本也人既是天地之心故聖人作法必用天地為根本祭帝於郊祭社於國是也端猶首也用陰陽為端首賞以春夏刑以秋冬是也春生夏長秋斂冬藏是法四時為柄也劍戟須柄而用之紀綱紀也日行有次度星有四方列宿分部昏明敬授民時是法日星為綱紀也量猶分限也天之運行每三十日為一月聖人制教隨人之才分是法月為教之限量也山川助地以通氣為地之徒屬聖王

象之立羣臣助已以施教為已徒屬也質體也五行
循廻周而復始聖人為教亦是法五行為體也執
禮義為器用可耕於人情人情得禮義之耕如田得
耒耜之耕也四靈以為畜則獲天地應以徵報也四
靈並至聖人畜之如人養牛馬為畜也

長樂陳氏曰以天地為本至於五行以為質以言其
所法者也禮義以為器人情以為田以言其所用者
也四靈以為畜以言其所致者也聖人作則必推其

所法以適其所用然後有所致矣

山陰陸氏曰自月以為量變以在下是月以為量非以月為量也蓋聖人作則能以天地為本以陰陽為端以四時為柄以日星為紀於是月以我而後得為量鬼神以我而後得為徒他倣此

嚴陵方氏曰操此而被為之用者柄也日星繫乎天之大而各有常度焉故以日星為紀大小之所容多少之所槩有數而可量者量也月受明於日而朔望

盈虧以三五之數可推焉故月以為量聖人作則以
天地為之始以人物為之終固其理也其序所以如
此

廬陵胡氏曰聖人父天母地是本也本猶原也端始
也柄所以斟酌言以四時斟酌和氣也紀次序也量
限也月滿必虧持滿者取法焉鬼神天帝言與天為
徒也質實也五行萬物之所終始也器如農夫治田
器也人情有治亂猶田之有荒墾也四靈治則見故

可畜亂則隱豈可畜哉

金陵應氏曰人之生也儲造化之精而不能自闡於造化鍾禮義之粹而不能自達於禮義備萬物之全而不能自用於萬物聖人作則因其所固有者順導而曲成之其法象則叅諸造化堯典所以欽若而厯象授時禹範所以建極而協紀念徵也其政治則取諸禮義商書所以欲其建中而制事制心周官所以教之中和而防情防偽也其效驗則集夫四靈舜樂

所以成於鳳儀周南所以終於麟趾也天地以全體
言大根大本之先立者也道之大原出乎天也陰陽
以氣化言闔端造始之可見者也立天之道曰陰與
陽也四時以運化言當權操柄之可握者也大昊執
規炎帝執衡之屬是也日星紀運乎周天之度驗其
次舍以分時令如網有紀以分其目一月遍匝乎周
天之度視其晦朔以課事功如物有量以揆其平鬼
神布列於天地之間造化之用也以之為徒則闔闢

變化常與之並行猶曰與之為徒也五行變合於陰陽之內造化之體也以之為質則亭毒胚胎不昧其所主五味五色之所以為質也有其質而無其具則善不能自遂故因其自然固有之禮義以為器而品節防範之道無不周有其器而無其地則功無所可施故因其可與為善之人情以為之田而修治墾除之功無不至四靈蓋物之變化而有神者非置網之所可循也能盡致而為之畜則德之所感可知矣

以天地為本故物可舉也以陰陽為端故情可睹也以
四時為柄故事可勸也以日星為紀故事可列也月以
為量故功有藝也鬼神以為徒故事有守也五行以為
質故事可復也禮義以為器故事行有考也人情以為
田故人以為輿也四靈以為畜故飲食有由也

鄭氏曰物天地所養生也情以陰陽通也事以四時
成也事以日與星為候興作有次第也藝猶才也十
二月各有分猶人之才各有所長也藝或為倪山川

守職不移故云有守也事下竟復由上始故云可復也考成也器利則事成也與猶主也田無主則荒由用也四靈與羞物為羣

孔氏曰此一節覆明前經諸事若行諸事治理皆應則萬事得成也天地生養萬物今本而為政教故萬物可舉而興也人情與陰陽通今法陰陽為教故人情可見也生長收藏隨四時無失故民不假督勵而事自勸成也日中星鳥敬授民時無失早晚故民事

有次第列猶次第也月以為量隨人才而教之則人竭其才之所長故功有藝山川鬼神各有分職不移今引鬼神為徒屬則事無失業故云有守五行相次終而復始凡所營為之事亦終而復始故云可復工欲善其事必先利其器若治國用禮義為器是器之利者故所治之事行必有成也上人是人民下人是聖人田無主則荒廢故用人為主今以人情為田聖人以為田主則人情不荒廢也靈是衆物之長長既

至為聖人所畜則其屬並隨其長而至是飲食有用也

橫渠張氏曰情可睹也情謂理循是以窮其理鬼神以為徒故事有守也因其自然而任之役鬼神之義順其自然則人鬼協濟人鬼協濟則豈非以為徒歟今山川百物生焉養成其材以時取之得非協歟先天而天弗違五行之氣運而為四時質據也順五行之氣用五行之材莫不以為質也至如東作西成捨

五行之序何以行五行相代不窮故事可復也四靈
以為畜能擾四靈則鳥獸之類豢養不失其情自天
地為本至四靈為畜一理也特細別耳事天治人與
夫接物無所不用其極能用其極則其餘不足治矣
此數句必出於古語亦非傳者所能道也

嚴陵方氏曰以天地為本則萬物皆末焉本既得則
末斯從焉故物可舉也舉言持之在我也陰陽者萬
物之情以陰陽為端則其情可探而見故情可覩也

以四時為柄則人順時之後先因時之動靜不敢辭
焉故事可勸也以日星為紀則晝之所參夜之所考
各得其序焉故事可列也月以為量則興事造業各
有數以致其能焉故功有藝也五行以為質則代廢
代興皆周而復始焉故事可復也四靈以為畜則人
之日用者皆易致焉故飲食有由也由言人因之致
用也

馬氏曰法象莫大乎天地故以為本而陰陽日月鬼

神皆天地之別也聖人作則莫不取象於此雖然聖人作則仰有法於天俯有察於地而近取於人情者禮義也禮義出於人情先王因之以為治情之具也自天地為本推而至於人情以為田其為法備其為治詳宜有休徵以應之也故終以四靈為畜然四靈以為畜聖人無意於是蓋在己有以立之在物者亦順之而不敢逆也以天地為本而曰物可舉者蓋萬物生於天地之間皆可舉而用之也天地之大端在

陰陽而人情之大端亦在於陰陽喜為陽怒為陰以
陰陽為端則人之情可覩而見也時者當其可之謂
也敬授之而弗失則事有所成故以為柄則事可勸
也日星者示其東作西成之候而使民之興作不失
其先後之序也故以為紀月者三五而盈闕其盈不
至於有餘其闕不至於不足故以為量量者言多寡
之均而無過不及之患先王之制禮必協於分藝使
賢者不敢過不肖者不敢不及藝者言各當其材也

鬼神在於幽其類非一而祖廟山川五祀各有守也
先王因以立官設其參傳其伍使之各司其局而不
敢失也五行者天地之間往來不窮終而復始故以
為質則事可復而不窮也四靈者猶為聖人而見畜
則天地之間飛潛陸走之類莫不甚多無非飲食之
用也

講義曰夫萬物生息於天地之間以天地為本則萬
物雖多而無所逃故物可舉也陽推五福以類升陰

幽六極以類降故凡為善者陽之類也為惡者陰之類也以陰陽為端則物情大見而可覩也時以作事事以厚生無先時而起無後時而縮故先時者殺無赦不及時者殺無赦以四時為柄而執守之故天下之事可勸而成也

山陰陸氏曰陰陽為端若觀其所聚觀其所感觀其所恒而天地萬物之情可見矣是也四時為柄若春誦夏弦春率民耕作秋率民收斂之類日星為紀若

日在北陸而藏冰龍見而雩之類月以為量成虧相
備故功有藝極也人情得聖人以為田故人以聖人
為奧無田則孰為養也無奧則孰與居焉四靈以為
畜聖人致治以是為終及其亂也亦以是為終若西
狩獲麟則是獸也非畜也且麟信而應禮不妄出者
也春秋哀公十四年胡為來哉飲食有由言四靈以
為畜故聖人飲食有由也如是而後享天下之大奉
無愧矣是之謂有由

廬陵胡氏曰功猶藝也藝極也春秋傳貢賦無藝鬼神以為徒鬼神不欺人以為與人謂民與主也民以為主也左氏昭十三年傳云國有與主

龍泉葉氏曰人性非所治所治者其情也聖人之治以天地陰陽四時五行為之綱目立之至公周盡物則故能深通人情之變平而治之凡人發於好惡利欲之私心激於事勢逆順之偏重者發為邪德隱為詖行皆其情之所宜有也雖其所以治之要不越乎

理義而情之委曲聖人不一施焉有當直從者有當
曲遂者有當明禁者有當預防者暢其不及裁其過
甚扶其緩弱通其壅蔽其治之有時其教之有機膏
潤成熟而善道備美俗一是故聖人發正於天理收
功於人情如良農之善稼也五穀之報必厚矣聽而
弗治長稂莠也治而弗達雜稊稗也不本其情而責
其成廢田者也如是則人豈能心服於聖人而恃之
以為與主哉

黃氏曰飲食之禮達則天下殺害有時物無暴殄庶人無故不食珍士燕食不兼羹胾上下咸以僭奢為恥是聖王治定無為之徵驗也故四靈以為畜者因飲食有由也天下飲食從禮故四靈為瑞應信及豚魚禮化明備也前儒不認由從於禮之義而解由為用其義失矣

何謂四靈麟鳳龜龍謂之四靈故龍以為畜故魚鮪不淦鳳以為畜故鳥不獮麟以為畜故獸不狘龜以為畜

故人情不失

鄭氏曰淦之言閃也猶狢飛走之貌也失猶去也龜
北方之靈信則至矣

孔氏曰此一經更解四靈之事謂之靈者以此四者
皆有神靈異於他物也淦水中驚走也閃是忽有忽
無魚從龍鳥從鳳獸從麟龍鳳麟既來為人之畜則
其屬見人自不驚而飛走也龜知人情既來應人知
人情善惡故人各守其行其情不失也上三者皆言

其長來而族至此應云龜以為畜而甲族馴狎今獨云感信而至者與上三族相互此言感信則上亦感仁義禮而至也案月令冬云其蟲介則龜為水蟲水主信故信則至水為信則土為知然水土二行俱有信知

嚴陵方氏曰麟體信厚鳳知治亂龜兆吉凶龍能變化故謂之四靈滄謂水動不滄以見魚之不驚躍也文王有靈德以及鳥獸昆蟲故謂其囿曰靈囿謂其

洎曰靈洎至於麋鹿濯濯白鳥騶騶於物魚躍鼉鼓
逢逢豈非能以之為畜故然耶

馬氏曰於龜又言人情不失何也蓋龜者能逆知人
之情狀而善惡吉凶皆不能逃之也

龍泉葉氏曰四靈為畜上世載之詳矣聖人盡人道
之正則彼動物之傑不得翻然自遂其雄技而一將
聽命於人於是蟲魚鳥獸無不順若而人之飲食生
養亦未有苟為溫飽而不自知其所由來者故變言

鳳凰來儀周公言遺我大寶龜孔子曰鳳鳥不至河
不出圖吾已矣夫此言物之聽命於人也後世先王
之治不可復見其所以為治之說儒者亦失其傳反
以異物之來為善祥嘉瑞之應不度其德之厚薄而
取必於異物之有無故怪異日興治象日隱如漢所
稱神爵五鳳黃龍其君臣歆豔皆以為天之報貺而
已嗟夫是人反聽命於物也

長樂陳氏曰魚鰲鳥獸至於不淦不獮不狘者蓋亦

不必實然所以誘君人者修德而已矣

故先王秉著龜列祭祀瘞繒宣祝嘏辭說設制度故國有禮官有御事有職禮有序

鄭氏曰皆卜筮所造置也埋牲曰瘞幣帛曰繒宣猶揚也繒或作贈

孔氏曰上既言龜知人情故此一節言卜筮所造置之事先王聖人將有大事必秉執著龜而問吉凶言著者凡卜皆先筮故兼言之陳列祭祀謂郊廟以下

皆用卜筮也瘞謂祀地理牲也祭法云瘞埋於泰折祭地也繒之言贈也謂埋告又贈神也祝嘏有舊辭更宣揚告神也設制度謂造宮室城隍車旗之屬以上諸事既並用卜筮故國家必有其禮國既有禮故百官各御其事官既有御故百事各有職主凡所行禮皆有次序也

長樂劉氏曰先王措天下如此而猶不敢以自任也於是有猷有為則秉於蓍龜求其明知於神也列於

祭祀歸其功德於祖也。瘞繒宣祝達其誠信於幽也。
嘏辭說者示其神靈之饗也。設制度者辨上下定民
志也。故國無大小皆有禮以稱之。故官有所御事有
所職禮有所序不相奪倫而五禮之施五品之實徧
於斯民一道德以同風俗莫非五常之歸也。

延平周氏曰：著者數也，數故為筮龜者象也。象故為
卜以先王之誠心敬德固足以感天下然猶秉於著
龜列於祭祀蓋以為吾之有為有行莫非稟受於神。

明而無非事者此國之所以有禮官之所以有御事之所以有職而禮之所以有序者也

嚴陵方氏曰秉著龜所以決禮之疑列祭祀所以致禮之敬瘞繒所以備禮之物宣祝嘏辭說所以通禮之情設制度所以修禮之文若是則可謂有其禮矣故繼言國有禮也繒帛藏之於幽故言瘞辭說揚之於明故言宣建國必設官設官必治事治事所以行禮故其序如此然上言國有禮則禮之體也下言禮

有序則禮之用也

山陰陸氏曰幽言瘞繒顯言宣祝嘏辭說不責不備也鄭氏謂埋牲曰瘞幣帛曰繒失之矣

故先王患禮之不達於下也故祭帝於郊所以定天位也祀社於國所以列地利也祖廟所以本仁也山川所以儉鬼神也五祀所以本事也故宗祝在廟三公在朝三老在學王前巫而後史卜筮瞽侑皆在左右王中心無為也以守至正

鄭氏曰患禮不達患下不信也祭帝於郊以下所以達禮於下也教民尊神慎居處也宗宗人也瞽樂人也侑四輔也

孔氏曰此一節為上並用卜筮民下猶未見信先王患之故更為下諸事使達下也天子至尊而猶祭於郊以行臣禮而事天是欲使嚴上之禮達於下天高在上故云定天位也至尊而猶自祭社是欲使報恩之禮達於下也地出財故云列地利也王在宗廟以

子禮事尸是欲使仁義之教達於下也王自祭山川
是欲使儉敬鬼神之教達於下也王自祭五祀是欲
使本事之教達於下也五祀是制度故云本事也此
明因事鬼神使禮達於下鄭註教民尊神是也宗祝
以下明因委於人使禮達於下也王在宗廟則委於
宗祝在朝職事則委任三公在學乞言則受之三老
若王弔臨則前委於巫動則左史書之言則右史書
之既言前巫故云後史也卜筮主決疑瞽是樂人主

和侑是四輔即左輔右弼前疑後丞皆侑勸人君為
善典規諫者示不自專故並置左右宗祝以下鄭註
慎居處是也既祭祀尊神及委任得人故王中心無
為以守至正之道也

長樂劉氏曰祭帝於郊也天位由之而定民不敢慢
於其上矣祀社於國也生物享其報而民不敢慢於
其神矣祖廟有祀也受祖有其德而民不敢慢於其
人矣山川有祀也報功有其秩而民不敢僭於其禮

矣故宗祝在廟者執祭祀之禮雖鬼神之大不可得
以亂之也三公在朝者執上下之禮雖君上之尊不
可得以踰之也三老在學者執人倫之禮雖異數之
隆不可得以變之也王前巫者辟除其心之疑慮也
後史者臨正其行之歌傾也卜筮鼓侑皆在左右者
防其言動之有失也夫如是也何為哉欲王之中心
無為也無為矣而曰以守至正者何謂也中心不為
於意慮則寂然而不動是人之正性也

長樂陳氏曰先王以為禮之行常在於人之所畏敬而人之所畏敬者在於天地鬼神故於其所畏敬而寓之以法則此禮所以達上下也夫惟禮之達於上下則君人有以安於上故宗祝在廟足以講禮正法三公在朝足以論道經邦三老在學足以乞言憲行前巫所以却不祥後史所以書言動卜筮在左所以決疑謀瞽師在右所以防非志凡此皆人之侑輔王中心無為以守至正而已矣

嚴陵方氏曰禮之始也則自天子出禮之終也則與民由之與民由之然後禮達而分定故先王患禮之不達於下則必有以為之教者然教必以祭祀為主者以神道設之使民知畏敬故也天則遠人而尊故祭帝於郊地則近人而親故祀社於國郊謂郊之南南者陽之盛故曰所以定天位國謂國之右右者陰之盛故曰所以列地利定天位則天下達於尊卑之禮矣列地利則天下達於施報之禮矣且位以祭之

所言也利以祭之物言也位欲其一故言定物欲其
陳故言列天神曰祀地示曰祭而此於天曰祭者郊
所以明天道故也於地曰祀者社所以神地道故也
仁以立人道而仁本乎祖故曰祖廟所以本仁也如
是則天下達於親疎之禮矣我為祭主於內而山川
之鬼神在外固有賓道故曰所以儼鬼神也如是則
天下達於興作之禮矣五祀出於五行而五行各因
時以用事焉故曰所以本事也如是則天下達於制

度之禮矣然於帝於社止言祭祀則祖廟而下皆主
祭祀可知也廟者神之所存而宗祝所以事神故在
廟朝者政之所出而三公所以共政故在朝學者教
之所寓而三老所以奉教故在學不祥却於未然故
前巫言行紀於已然故後史卜以知象筮以知數瞽
以典樂侑謂侑食左右前後皆得其人則王非特外
之無為也中心亦至守正夫天下之動貞乎一而止
苟非以至正為守則天下之動莫之能正雖欲無為

也其可得乎以玉藻考之史有左右而此乃言後史者對前巫言之則為後而後自分左右故也以膳夫考之王日一舉以樂侑食則知此言瞽言其人侑言其事爾

馬氏曰天位乎上而生時不窮聖人祭天於圜丘所以嚴上也故曰定天位地位乎下而生財不已聖人祭地於方丘所以因下也故曰列地利祖廟遠則殺之所以示其義近則隆之所以示其仁離而言之則

有仁義之別合而言之皆所以親親仁也故曰祖廟
以本仁禮器所謂宗廟之祭仁之至者其意同也山
者地之高川者地之深而皆有興作之功有鬼神以
助其幽故所以儼鬼神五祀者中雷戶竈門行制度
所出亦治天下之事也自郊社推而至於五祀皆所
以達於下者也以一人之身不能達於天下必寄於
羣材然後能如此以至於無為而治也故繼之以宗
祝在廟三公在朝三老在學既曰中心無為又曰以

守至正何也蓋入之情安久則逸逸久則亂故中心無為而繼之以守至正然後能守其無為之道也

龍泉葉氏曰禮之理顯而事隱禮之理可極而事難名故先王非以禮之不備於其身為憂而以禮之不達於其下為患也夫禮者聖人以為因我之所設而後明耳故天位未嘗不定也必祭帝而後定地利未嘗不列也必祀社而後列廟吾之所為祖而曰此仁之本也山川效地之俯仰而已嚴而奉之以儼於鬼

神也居處器服切於人而已本其事之所由起尊而先之曰有神之所為也廟有宗祝朝有三公學有三老五前史後卜筮瞽侑皆在左右濟濟然秩秩然森然凜然有觀有聽有效有法而王不自見其所為也凡其為此者皆以達夫禮也故百神受職百貨可極孝慈服正法則而禮誠達矣義之修禮之藏其器數名物反復委曲不可窮盡也不然則夫薄禮者之論以為天本高地本厚日月本明萬物與人未嘗不自

然而聖人者烏用是區區其間哉況夫俗靡事弊而極究於敲扑趨走之不給則先王之所以達禮於天下之具是誠有所不能識者矣然則禮之所以本所以分所以轉變者何從知之徇今而忘禮不可也徒誦古之言禮者樂而味之而不考於今之何以合何以不合不可也

江陵項氏曰王前巫而後史卜筮瞽侑皆在左右之位聖王豈溺於淫瞽者哉誠見夫顯微之無間天人

之合一視聽言動之變即風雨寒燠之源故考驗占
察如此其密也詩曰文王陟降在帝左右此之謂也
又曰昊天曰明及爾出王昊天曰旦及爾游衍譏厲
王之不能察也

延平周氏曰瞽言其人侑言其理先言宗祝立於禮
也終言瞽侑成於樂也

建安真氏曰古之所以衆建忠賢森列左右者皆以
正人君之心也在朝則有三公焉所謂道之教訓傳

之德義保其身體者在學則有三老焉所謂憲德
乞言者也巫掌祀以鬼神之事告王史掌書以三皇
五帝之事告王掌卜筮者以吉凶諫王瞽矇之叟以
歌詩諫王一人之身而左右前後挾而維之以引以
翼有孝有德雖欲斯須自放得乎故王中心他無所
為惟守至正而已後世人主所親者瞽御近習所說
者淫聲美色狐媚蠱惑者千態萬貌雖欲無邪其可
得乎此君德所以不如古也

蔣氏曰聖人惟能定天下之禮而後可以辨天下之職天下之職既辨則一己之職亦不勞而自舉此王者所以惓惓於禮以御斯世也蓋禮有大有小則職亦有尊有卑方其祭帝於郊就陽以定天位祀社於國答陰以列地利祖廟崇報反之仁山川饋遠近之職五祀彰不一之事大者不得以兼乎小小者不得以干乎大義有所由生文有所由寓此其禮一定而不易者也夫惟禮之大小一定不易故設官崇卑亦

各有攸司而不相亂坐乎朝者議不及乎末尊乎學者職不關乎細宗祝在廟儀文是掌弗及乎大事也巫史前後卜瞽左右彼特以問吉凶職聰察司辭說而弗與乎大本也夫是以上而總化原者有其人至於侍御僕從罔有弗正故一人中心無為於上而治道以立乃若官職廢闕典禮隳壞天下正人直士既不得尊於朝禮於學則下而宗祝工師之徒亦不得盡其才效其藝昔者孔門記晚周之時大師摯適齊

以下傷魯之不用人也若是則宗祝安得在廟卜筮
瞽侑安得在左右或用人不當其位如衛之賢者仕
於伶官無非可以承事王者之人乃碩人俛俛公庭
萬舞如簡兮之刺則三公安得在朝三老安得在學
然則王者欲守至正以御天下必如古聖人之定禮
分職而後可以收無為之治功

故禮行於郊而百神受職焉禮行於社而百貨可極焉
禮行於祖廟而孝慈服焉禮行於五祀而正法則焉故

自郊社祖廟山川五祀義之修而禮之藏也

鄭氏曰言信得其禮則神物與人皆應之百神列宿也百貨金玉之屬修猶飾也藏若其城郭然

孔氏曰此一節論上文禮既達於下有功而見徵應百神天之羣神也王者郊天備禮則星辰不忒故云受職祀社盡禮則五穀豐稔金玉露形盡為國家之用故云可極祭廟盡禮而天下皆服行孝慈祭五祀以禮而天下法則各得其正不言山川興作者法則

之事包之也祭在上諸神是義之修飾禮之府藏也
長樂陳氏曰禮行於郊而百神受職焉者以其大報
天而百神莫不與之也禮行於社而百貨可極焉者
以其五土之宜百物資之以生也禮行於祖廟而孝
慈服焉者以其有祝以告人之孝而有嘏以告人之
慈也禮行於五祀而正法則焉者以其有制以正法
有度以正則也言郊社祖廟五祀而不及山川者以
社言百貨可極則兼之也夫義則有宜禮則有體務

其宜以歸其體然後五者之教全矣故曰義之修禮之藏也

嚴陵方氏曰受職言各受其職而有守也可極言各盡其利而無遺也正法則者以制度之所在故各得其法則之正也其行於始也祭帝於郊而已故終至於禮行於郊焉其始也祀社於國而已故終至於禮行於社焉固其序也推之於祖廟五祀其義亦若是

爾

廬陵胡氏曰百神如詩云懷柔百神鄭指星辰大泥
禮藏於郊社天地之中

四明沈氏曰自郊至五祀皆言禮行正孟子不誠未
有能動者也不是說行禮我與神為二不可謂之行
無所往而不感通此之謂行聖人之誠足以感神而
無間故無往而不得其所欲

宓氏曰義者理也禮者文也義者內也禮者外也人
之於禮始也見其禮而未知其所以為義謂之禮修

而義藏可也故由義而不自知亦猶假筌以求魚魚得而忘筌因蹄以獲兔兔得而忘蹄故曰義之修而禮之藏也

蔣氏曰郊社祖廟山川五祀之義禮運一篇蓋累累言之大旨則同至此則曰百神受職曰百貨可極曰孝慈服曰正法則備言聖人為禮之效也謂之義修而禮藏則聖人因義以起禮因禮以辨義禮義之為說實相表裏

禮記集說卷五十七

謹案第二十九頁前二行傳其伍刊本傳訛傳據

周禮改



覆校官編修臣項家達

校對官庶吉士臣邱庭滢

膳錄監生臣侍臣